

Visoki predstavnik donio Odluku kojom se usklađuje sastav federalnih i kantonalnih organa vlasti sa Odlukom Ustavnog suda o konstitutivnosti naroda

Visoki predstavnik, Paddy Ashdown, je jučer donio Odluku koja će omogućiti brzo formiranje kantonalnih organa vlasti u skladu sa aprilskim izmjenama i dopunama Ustava Federacije, a kojima se osigurava pravična zastupljenost svih konstitutivnih naroda. Ovom Odlukom će se riješiti pitanje dupliciranja administracije i troškova koji bi nastali ukoliko bi se kantonalni organi vlasti formirali, zatim raspustili da bi se odmah nakon toga ponovo formirali u skladu sa ustavnim amandmanima koje je potrebno implementirati na kantonalnom nivou na osnovu reformi koje su političke stranke u martu dogovorile u Sarajevu. Parlament Federacije i kantonalne skupštine su pokušale pronaći rješenje ali, na žalost, nisu uspjeli postići dogovor.

Jedan od osnovnih ciljeva ove Odluke je da se što je prije moguće osigura formiranje organa na kantonalnom nivou, i da se političarima koji su izabrani u subotu omogući da odmah nastave sa provođenjem aktivnosti na zadacima hitnih reformi koje su sami definirali.

Odlukom se pojašnjavaju mehanizmi koji će osigurati pravičnu zastupljenost konstitutivnih naroda u kantonalnim organima uprave. Odlukom se definira mehanizam zaštite vitalnog nacionalnog interesa na kantonalnom nivou, reorganizira i umanjuje broj ureda u kantonalnim izvršnim organima kao i

njihove nadležnosti, te se zahtijeva da u svakom kantonu, u kojem prema zadnjem popisu dva konstitutivna naroda čine 30 % ili više od ukupnog broja stanovnika, potrebna najmanje dvotrećinska većina u kantonalnoj skupštini za izbor organa vlasti. Ovom Odlukom se prema tome umanjuju troškovi organa vlasti te se omogućava da se finansijska sredstva usmjeravaju na potrebe građana odnosno isplate plaća nastavnicima i doktorima te finansiranje javnih službi od vitalnog značaja. Odlukom se uspostavljaju zaštitni mehanizmi putem kojih se na odgovarajući način štite prava svih konstitutivnih naroda. Na taj način se političkim strankama omogućava brzo formiranje organa vlasti i usmjeravanje napora na pitanja koja su prioritetna za građane BiH: zakonitost i zapošljavanje.